

Makaburu watishia kupiga Msumbiji

U. 15.10.87 Uhuru 15/10/87

JOHANNESBURG, Afrika Kusini

UTAWALA wa Makaburu wa Afrika Kusini kwa mara nyingine umetishia kwamba utaishambulia Msumbiji kutokana na kile ambacho utawala huo umekiita kuendelea kwa serikali ya Msumbiji kuwasaidia wapigania uhuru wa chama cha ukombozi wa Afrika Kusini cha ANC.

Waziri wa Ulinzi wa Makaburu, Magnus Malan amedai katika hotuba moja kali eti Rais Joaquim Chissano wa Msumbiji anaendelea kuwaruhusu wapigania uhuru wa ANC kuitumia ardhi yake kuanzishia mashambulizi dhidi ya utawala wa Makaburu.

"Tunamtarajia Rais Chissano achukue hatua madhubuti kurekebisha hali hii la sivyo tutalazimika kuwasaka wapigania uhuru hao ndani ya Msumbiji" alisema Kaburu Malan

wakati wa uzinduzi wa kituo kimoja cha ndege za kivita karibu na mpaka wa nchi hiyo na Msumbiji.

Mara kwa mara utawala wa Makaburu unapojitayarisha kufanya mashambulizi dhidi ya moja ya nchi za mstari wa mbele wa ukombozi hutanguliza madai kuwa nchi hiyo inaruhusu ardhi yake kutumiwa na wapigania uhuru kufanya mashambulizi dhidi yake.

Wachunguzi wa mambo wameeleza kuwa kufunguliwa kwa kituo cha ndege za kivita karibu na mpaka wa nchi hiyo na Msumbiji ni sehemu ya maandalizi ya mashambulio ya utawala huo dhalimu dhidi ya nchi jirani, za Zambia, Msumbiji, Zimbabwe na Botswana.

Kaburu Malan alidai kuwa ANC imekwisha fanya mashambulizi 31 ndani ya Afrika Kusini na kuuwa askari wake 13 mwaka huu.

Wakati huo huo kiongozi wa Chama cha Ukombozi wa Namibia, SWAPO, Ndugu Sam Nujoma ameushutumu utawala wa Makaburu wa Afrika Kusini kwa khusika na mlipuko wa bomu katika gari moja mjini Harare, juzi, Shirika la Habari la PANA limeripoti.

Wakati huo huo, Habari kutoka Harare, Zimbabwe zinasema kwamba Zimbabwe imeshutumu utawala wa Makaburu wa Afrika Kusini kwa mlipuko wa bomu uliotokea mjini Harare juzi na kujeruhi wakazi 18.

Serikali ya Zimbabwe imesema mlipuko wa bomu hilo ni ishara ya utawala huo wa kutaka kuendeleza vitendo vyake vya kuvuruga nchi hiyo.